

近代中國史料叢刊第九十五輯
沈雲龍主編

洪北江（亮吉）年譜

呂培編

文海出版社
有限公司印行

Wt 204/1000

洪亮吉年譜



洪亮吉年譜

目錄

年譜

一——七〇

附錄

- 一、常州府志：洪亮吉傳……………七—
- 二、法式善撰：翰林院編修洪稚存先生行狀……………七四
- 三、孫星衍撰：翰林院編修洪君傳……………七八
- 四、謝階樹撰：洪稚存先生傳……………八一
- 五、趙懷玉撰：翰林院編修洪君墓銘……………八五
- 六、吳錫麒撰：翰林院編修洪君墓碑……………八八
- 七、孫星衍撰：翰林院編修洪君墓碑銘……………九四
- 八、秦 瀛撰：翰林院編修洪君墓表……………九八
- 九、洪亮吉撰：乞假將歸留別成親王極言時政啓……………一〇二

洪北江先生年譜 (1746-1809)

門人旌德呂培等同編次

先生姓洪氏，諱亮吉，字君直，一字稚存，號北江，晚號更生，行一，江蘇常州府陽湖縣左廂花橋里人。先世本居歙縣洪坑，系出唐宣歙觀察使經綸，始避唐敬宗諱，改宏氏爲洪氏。三十六世，至先生高祖千運府君，諱德健，國子監生，封中憲大夫，娶程恭人，生子二，長爲先生曾祖秋山府君，諱璟，康熙戊寅拔貢生，山西大同知府，崇祀交城大同名宦祠，娶汪恭人，歙國子監生世昌女，繼娶徐恭人，歙處士成教女，生子十一

，次爲先生祖封旅府君，諱公衆，國子監生，考授直隸州同知，贈承德郎，養於常州趙氏，遂遷居焉。娶趙安人，武進戶部尙書諡恭毅申喬孫女，翰林院侍讀熊詔女，生子五，次爲先生父午峯府君，諱翹，國子監生，累贈奉直大夫，娶蔣太宜人，武進歲貢生，封奉政大夫金聲孫女，雲南嶧峨知縣敦淳女，生先生兄弟二人。

乾隆十一年，丙寅，先生一歲，以九月初三日子時生於常州中河橋東南興隆里賃宅中，宅後有積水池，先生生於池南西舍。

十二年，丁卯，先生二歲。

十三年，戊辰，先生三歲。

十四年，己巳，先生四歲。午峯府君命先生伯姊課之識字，先生

每字必詢其義，日晚皆爲蔣太宜人述之，是年凡識七八百字。

十五年，庚午，先生五歲。在家塾從季父希李先生授禮記大學中庸兩篇，正月八日，仲弟霽吉生。

按先生從父四人長諱翰，字翮飛，行一，國子監生，未婚卒。次卽午峯府君。次諱翔，字雲上，行三。次諱翻，字君佐，行四，國子監生，贈修職郎。次諱翱，字希李，行六。先生仲弟字赤存，行二。

十六年，辛未，先生六歲。在家塾授論語。七月二十日，午峯府君客鎮洋縣署，得疾歸，未至五十里，以廿四日申時卒於洛社舟次，越日，殯於城東天寧寺華房，先生隨蔣太宜人暨三姊一弟守殯宮，凡五十日始歸。

十七年，壬申，先生七歲。以午峯君府卒，貧無所依，隨蔣太宜人及姊弟寄居外家。外王母襲太孺人之意也。時外家亦窘，蔣太宜人率諸女勤女工自給，并儲修脯，俾先生就外家塾受經，率夜四鼓方就寢，事詳機聲燈影圖記，及南樓憶舊詩。是歲，塾師爲莊觀五先生，城西坂上鄉人，同學則其子驊剛，表兄肇新，廷耀，馨凡四人。讀論語畢。

十八年，癸酉，先生八歲，在外家塾，從惲牧菴先生銘受孟子。惲先生武進縣學附生，憫先生幼孤而慧，常分館餐食之，後其孫與三以乾隆甲午科舉順天鄉試，爲先生同歲生，惲先生猶及見之。

十九年，甲戌，先生九歲。在外家塾，從黃敬菴先生朝俊受孟子

，及毛詩國風。黃先生武進縣學增生，課讀極嚴。是秋，先生適楊氏從母亦以嫠居，貧苦無依，率二女僦從兄啓宸後樓以居，與外家相近。移舍日，值先生讀孟子『既醉以酒』一章，解塾詣其處，龔太孺人及蔣太宜人適在坐，因舉『宜其室家』句命之屬對，卽應聲曰：『飽乎仁義』，龔太孺人極賞之，自此益鍾愛焉。是歲，表弟定熙亦入塾，與先生年相若，後卒於叔素園先生官舍，先生有詩哭之。

按先生舅氏三人：長名樹誠，字實君，國子監生，贈登仕郎；次名琦，字素園，乾隆甲子舉人，江西德興知縣，皆蔣太宜人兄；次名蘅，字曙齋，乾隆壬午科副榜貢生，賜檢討銜，出嗣世父淮安教授文元後，爲蔣太宜人弟，事皆詳先生所

撰外家記一卷。處士肇新，少府廷耀，上舍馨，處士定熙奎耀，皆實君先生子，蔣太宜人之姪，先生之配蔣宜人兄弟也。

二十年，乙亥，先生十歲。在外家塾，從黃先生受毛詩畢。

二十一年丙子，先生十一歲。蔣太宜人率先生歸興隆里舊宅，從旁舍塾師受尚書，同學生徒十餘人，不能徧課，每篇音訓謔者恆至十數，日夕歸，蔣太宜人令之背誦，必爲泣而正焉，如濟河惟兗州，兗讀作袞之類。九月八日，叔父君佐先生卒於廣西百色廳寓舍，無子，以仲弟爲之後，十二月，伯姊適城北前橋村 芮處士 光照。

二十二年，丁丑，先生十二歲。從周線里 岳介錫先生受禮記。是

冬，舅氏素園先生以國史館臚錄議敘，選授江西德興知縣，迎養龔太孺人於官舍，自此蔣太宜人益貧苦無所依。

二十三年，戊寅，先生十三歲。仍就外家從表兄肇新受禮記及周易。塾課畢，先生始學作詩，嘗作中秋卽景詩，有「月出百尺樓，花香三重門」之句，不敢示人，惟以示表弟定熙。冬十月，舅氏實君先生卒於德興官舍，表兄肇新奔喪西上，因從陳寶先生寶讀書。先是丙子科陳先生赴江甯鄉試，舟覆於江，午峯府君往館世執漳浦蔡太守觀瀾江甯官署，塗次遇之，急募舟以拯，并助館金一笏爲試費，陳後以己卯舉於鄉，與先生亦中表兄弟也。課徒之暇，喜錄唐宋詩餘，于是先生亦學作小令，并与表兄警日課漢魏六朝三唐詩，成誦乃已，是月仲姊適同里汪

上舍德涓。

二十四年，己卯，先生十四歲，在鹿苑菴從董獻策先生舒傳授春秋左傳，并學作制舉文半篇，董先生常州府學附生。同學十數人，惟與楊布衣毓舒交最密，暇卽唱酬往還，是歲作詩數十篇，及斥釋氏文一首。

二十五年，庚辰，先生十五歲。在西廂溝謝氏塾從唐麟臣先生爲垣受左傳及史記漢書雜文。唐先生武進縣學附生，工詩。三月上巳，先生始作制舉文全篇，題爲，「則以學文」一句，文成後，唐先生極賞之，同學爲謝孝廉榕，上舍振祺等四人，孝廉與先生極契，後中乾隆戊申科順天榜舉人。是歲先生有附塾驅兒諸詩，及送表弟定熙至江西官署詩，集中始有存稿。

二十六年，辛巳，先生十六歲。從菱蒲里繆映藻先生謙受唐宋雜文。及制舉義。繆先生江陰縣學廩生，同學爲陸上舍焜，布衣文在，張布衣先甲兄弟，凡十餘人，三月，初應童子試，不售。

二十七年，壬午，先生十七歲。在百花樓巷莊氏塾從金壇荆廷緯先生汝翼受公羊段梁及制舉義。荆先生金壇縣學廩生，先生從表姊子，長於先生八歲，舉業最工，因是始識作文法。荆先生後以是科副榜貢生中順天癸卯舉人，己酉進士，官華亭教諭卒。是歲，同學爲莊上舍遠兄弟二人。始學作古文，有祭花神文，及閩居南樓夜宿初生十五六等詩，初與唐上舍鵬訂交，間有唱和焉。

二十八年，癸未，先生十八歲。在城北四十里郵村鄒翁元士家塾，仍從唐麟臣先生習制舉義，同學爲鄒福梅廷梅金川三人，鄒翁極重先生，欲以女妻之，知有所聘乃止。五月，解館歸，卽染時疫，復延及全家，蔣太宜人病瀕危者數次，大母趙安人，大父封旅府君，卽於是月相繼卒，先生承重居廬，至匝月後，病稍瘳。八月初，復赴鄒氏塾。是秋，舅氏素園先生罷官，奉龔太孺人旋里，先生解塾，卽從蔣太宜人仍居外家，與表兄馨，從表兄定安尤契，倡酬談讌，每徹晨夕，郭北篇中井鄉歌諸詩，皆是年作也。

二十九年，甲申，先生十九歲。從北後街余芑貽先生豐受唐宋古文，及制舉義。余先生常州府學附生，奇賞先生，有異才之目。

。每課文日，先生常兼作數篇，或一題卽製其二其三，午餘，諸同學方構思未就，輒已交卷，時蒙擊節嘆賞。歲暮解塾，獨爲詩送先生，次卽賞楊生清翰，後楊成乾隆甲辰進士，里中皆謂余先生有知人之鑒焉。是歲同學爲余先生子明經彤，及楊章秦畢諸生，共十餘人。有雲谿春詞獨酌謠諸詩，始學爲駢體文。

三十年，乙酉，先生二十歲。在外家團瓢書屋授表弟兆岫經，（素園先生子）歲得脩脯錢二千八百，暇卽從舅氏曙齋先生問業。時表兄馨從表兄定安皆授徒於家，三人昕夕往還無間，有春園唱和集。又與里中諸名士結社，訂交始廣，有題阿房宮圖諸詩，填詞四十餘首。

三十一年，丙戌，先生二十一歲。仍在外家授徒，從學則表弟兆响，從表弟榮（從舅氏秀君子）衡章（族舅氏濟川子）三人，歲入脩脯錢七千。正月二十五日，叔父雲上先生卒。六月，應童子試，不售。是歲詩社以洗研池賦檳榔行雲谿竹枝詞命題，先生試列第一。又在楊氏騰光館會課，凡四十人，皆里中名宿，先生年最少，從舅氏榕齋先生閱其文奇賞之，亦列為第一。此後先生常詣舍南竹屋問字，至辛卯秋客皖江乃已。又賦中秋減字木蘭花詞十首，同輩傳鈔殆徧。劉文學宸贈詩云：「才子清眠起夜分，新詞字字鏤香雲。何當共握琉璃管，寫盡羊欣白練裙。」是歲詩詞約及百首。

按雲上先生四子，長開吉，字元愷，為先生從兄；次顯吉，

字尙儀；次巨吉，字禹平，次良吉，字元良；皆先生從弟。

蔣榕盒先生名和寧，乾隆壬申進士，由翰林編修，改官湖廣道監察御史。

三十二年，丁亥，先生二十二歲。適汪氏仲姊以先生制義不進，因與蔣太宜人謀，復令先生在張王廟西潘氏塾從時月圃先生元福受作文法，束脩二十千，皆仲姊獨任之。時先生乾隆壬申舉人，中甲戌明通榜，工帖括，同學則潘上舍尙基，方上舍起莘，青陽陳上舍蔚，江陰陳秀才宏器諸人，尙基之叔振煥，亦舊識也。六月，應童子試不售。七月，諸同學就江寧鄉試，先生又傲鹿苑菴後雲閣讀書，每夜輒至三鼓，僧徒厭之，託言有賃宅者，遷先生入菴旁土室中，上漏下濕，居之晏然。冬十

月，外王母龔太孺人病劇，先生自塾中歸侍疾，衣不解帶者旬日，及卒，慟哭嘔血，七七竟，始奉蔣太宜人歸興隆里舊宅。

是歲，有南樓贈書圖記訪從叔縣尉至昆山紀游哭外王母諸雜體詩。

三十三年，戊子，先生二十三歲。在仲姊宅授汪錫楷經。汪氏居天井里，室宇深邃，宅中所延經師則同里段布衣聖烈，李布衣瑞寬，與先生爲三。其羣從皆好賓客，每有文讌，三人者恆首坐焉。九月十六日，蔣宜人來歸，先生贊於外家，凡三日始同歸興隆里舊宅。宜人蔣太宜人兄寶君先生女也。婚甫五日，卽赴弔邵先生齊齋於常熟，邵先生乾隆壬戌翰林，主常州龍城書院，奇賞先生與黃君景仁。是歲有催粧詞哭邵先生及游虞山詩。又

有寓興詩二十首，及東鄰棄婦等詩。寓興詩後卽失去。

三十四年，己丑，先生二十四歲。仍館汪氏，正月，叔姊適同里史君德孚。五月，應童子試，補陽湖縣學附生。七月，與諸同人訪城西徐墅陳刺史明善於亦園，與無錫邵秀才辰煥，江陰屠進士紳，同里劉文學駿，中表莊上舍寶書，趙上舍懷玉，唱和詩極多。是月，長女傅簫生，未幾殤。有贈趙表弟七言長歌。

按先生少孤，午峯府君未及命名，初名蓮，字華峯，是年以縣試第二，府試第三，院試第八，補縣學生，督學則副都御史滿洲景福也。後以壬辰年改名禮吉，辛丑年就試禮部，以嫌名當有所避，復改今名。莊爲先生從母之子，後官聊城縣丞。趙爲先生祖母兄兩浙鹽驛道佃數之孫，以庚子召試舉人，

官內閣中書，青州府同知。

三十五年，庚寅，先生二十五歲。仍館汪氏，從學者甥楷及汪生植等三人。七月，偕黃君景仁附瓜船至江寧鄉試。九月，榜發，薦而不售。有游京口三山及江寧雜詩。是秋，識錢唐袁大令枚於江寧，大令謂先生詩有奇氣，逢人輒誦之，始與里中董太守思驥左刺史輔訂交。

三十六年，辛卯，先生二十六歲。仍館汪氏，從學者汪董諸生等四人。五月，偕趙表弟懷玉赴江陰，同寓趙孝廉敬業寓齋。科試一等四名，補增廣生。七月十日，次女傳綫生，越歲春卽痘瘍。偕楊秀才繼曾炳文，劉上舍培基赴江甯鄉試，同寓秦淮河房。九月，榜發不售。十一月，先生以館穀不足養親，買舟至

安徽太平府謁朱學使筠，時學使尙未抵任，沈太守業富素重先生，留入府署。未匝月，適安徽道俞君成欲延書記，太守以先生應聘。已至蕪湖，有留上朱學使書，學使得之甚喜，以爲文似漢魏，卽專使相延入幕，以臘月八日復抵太平，黃君景仁已先在署，學使作書徧致同朝，謂甫到江南，卽得洪黃二生，其才如龍泉太阿，皆萬人敵云。是年秋，在江寧與汪明經中顧進士九苞訂交。及入學使署，又與邵進士晉涵，高孝廉文照，王孝廉念孫，章孝廉學誠，吳秀才蘭庭交最密，由是識解益進，始從事諸經正義及說文玉篇，每夕至三鼓方就寢，是年所作詩文逾百篇。

三十七年，壬辰，先生二十七歲。在安徽學使署，隨歷徽州甯國

池州安慶廬州鳳陽七府，六安一州，徧游采石青山敬亭黃山齊雲齊山諸名勝。六月，以歸省旋里。七月，仍赴太平。十一月，以兩世六棺未舉，歸奉先生祖父母，及午峯府君，叔父雲上君佐兩先生，叔母趙孺人柩葬於城北前橋村新塋。是冬，以所負多，訪蔣編修士銓汪孝廉端光於揚州，編修解橐金助之，乃得歸，已迫除夜矣。是歲作文二十餘篇，詩二百餘首。

三十八年，癸巳，先生三十八歲。時四庫館始開，江浙搜采遺書，安徽省設局太平，聘先生總司其事，沈太守業富并延兼管書記。閏三月十六日，長子飴孫生。七月，朱學使閱卷乏人，復延先生偕試徽寧二府。九月，自徽州偕汪孝廉端光歸里，由新安江徧遊嚴陵富春及錢唐山水諸勝，唱和幾及百首。十月，先

生以不能家食，往謁胡按察季堂於蘇州，因訪趙表弟懷玉於穹窿，同游東西兩洞庭，入林屋洞，探金庭玉柱之勝，宿包山寺。二夕，記游詩約十餘首，月杪復歸。時錢文敏公維城居憂在里，見先生詩文奇之，徒步過訪焉。是冬，移居白馬三司徒里賃宅。

十二月，聞朱學使離任入都，因附江陰繆君晉階赴廣西便舸至太平送之。（繆君爲先生舅氏素園先生塔，時還來賓縣界牌司巡檢，挈家赴任。）貧不能歸，沈太守業富，袁大令枚皆薄助行資，於歲除日騎驢抵里，有感族人饋新炭詩，作兩晉南北史樂府二卷。

二十九年，甲午，先生二十九歲。正月，赴江陰補壬辰年歲試。先是，錢文敏公會語學使彭閣學元瑞，謂先生爲昌黎復生，由是閣學亦久知先生。十三日，補試準附一等三名，後又次蔣編

修士銓元韻贈先生七百一篇，薦入常鎮通道袁君鑒署授徒，歲修百二十金，并令在揚州安定書院肄業，膏火費亦及百金，自此將母稍裕。七月，偕黃君景仁赴江寧鄉試，同寓明徐氏東園舊址。是科闈中得文及五策已定作元，房師賈先生景誼（乾隆丁丑進士官蘇州總捕同知。）以首藝有別解，與兩主司力爭，因定作副榜第一焉。座師則翰林院侍讀學士，今文華殿大學士董公誥，司經局洗馬今兵部尚書劉公權之也。榜發，座師及學使皆惋嘆不置。十月，復詣揚州，冬杪始歸，偕汪孝廉端光，唱和詩極多。是歲，始與孫君星衍訂交，同里則孫黃趙諸君外，復偕楊君倫，呂君星垣，徐君書受唱酬無間，里中號爲七子。

四十年，乙未，先生三十歲。彭閣學薦入江寧陶太守易署中修校

李錯尙史，匝月事竣，太守亦重先生，因延課其孫，兼管書記。四月，以太守俸滿入都，因歸省親。七月，復至江甯。九月，太守擢惠潮嘉兵備道，先生以親老不能遠游，因就句容林大令光照聘，課其壻漳浦鄭秀才聯華。時孫君星衍尊人孝廉勳官句容教諭，而訓導全椒朱君沛，縣丞錢唐汪君蒼霖皆工詩愛客，縣中紳士王廣文，吉士兄弟，沈公子衣言，亦慕與先生交，凡客容句三月，文謙殆無虛日。又徧游茅山棲霞，紀游詩約數十篇。臘杪始歸里門。十二月十日，次子盼孫生。

四十一年，丙申，先生三十一歲。正月，仍至句容縣署，二月歸里，旋至揚州及江甯訪友。三月，復往句容，校縣試文。四月，以林大令罷任歸里。時浙江學使王公杰欲延先生校文，七月，

往謁學使於紹興，值其扁試，例不當通刺，資斧幾至乏絕。及試畢往謁，學使一見先生如舊相識，遂偕往試台州處州二府，中途歷天台雁蕩諸勝，皆有詩紀事。十月二十六日，蔣太宜人在里猝得中風疾卒，春秋六十有三，仲弟以先生在千里外恐得訃後驚悼有他變，卽作札言太宜人病狀，屬姊壻史君德孚持至處州，并促偕歸。到日亦直扁試，留書而返。先生於試畢得書，星夜遄返。十一月十四日，晡時，舟至賊墅堰，距常州三十里，疾步至城，有僕窺園父仇三爲營卒，途遇之，問家中狀，仇以實告，先生驟聞哀耗，五內昏迷，方度八字橋，忽失足墮水，兩岸陡削，人不及救，隨流至滕公橋，有汲者見髮颺水上，攬之得人，試心口尙微溫，始呼衆集救，問里中識者共昇至

家。救者不知先生，疑爲避債赴水，及審狀，則皆曰孝子，悲嘆而散。天嚴寒，衣履冰濕，鄰人蔣松圓釋先生衣自解衣衣之，舉家號哭呼救，久之方蘇，搶呼痛哭，幾不欲生，水漿不入口者五日，諸姊以大義責先生，始稍進米飲。七七內僅啜糲粥，席藁枕凶，晝夜號哭，終喪不進肉食，不入內室，所服皆白衣冠，不御緇布。自以未及侍蔣太宜人含歛，哀感終身，嗣後每遇忌日輒終日不食，客中途次不變，三十年如一日。是歲，在苦次撰次蔣太宜人行述。

四十二年，丁酉，先生三十二歲。居憂在里，授徒，從學者汪翊楷，劉生登禾，孫生星衡瑀，及張楊諸生凡七人。長子飴孫時已五歲，亦日課以爾雅十數行。十一月，座師劉公權之視學安

徽，遣人相延，先生亦以營葬乏資，遂於長至前由陸程赴太平，并約孫君星衍偕行。劉公相待有加，以先生衣縞素不肯更易，因約值節日朔望皆聽獨處，專遣人司飲食，在學署一載，率以爲常。又因先生譽孫君學行，因并款留以助衡校。自是先生與孫君助學使校文外，共爲三禮訓詁之學，留太平度歲。

四十三年，戊戌，先生三十三歲。在安徽學使署。二月，隨試太平徽州寧國池州四府，五月中始返太平，偕孫君至句容學署度夏。七月，復同詣太平，隨試江北諸州府。十一月，在滁州，因葬事先歸，以十一月廿六日祔葬蔣太宜人於午峯府君墓，知友在百里以內者咸來會葬，如高郵金君蘭，無錫楊君芳燦兄弟及同里孫君等，皆館於白馬三司徒里，賃宅旬日方去。先生在家

次三日，夜負土成墳始歸，歲暮，以負債多，借孫君至句容。聞座師劉公遭母憂，復親詣太平弔唁，至除夕前仍回句容。

四十四年，乙亥，先生三十四歲。仲弟以少孤失學，假仲姊資學爲賈，累歲虧折資本，至無以償，時先生服闋歸里，決計攜弟北上，別謀進取。又以無行資，袁觀察鑒薦入常州黃太守澤定署閱府試文，薄有所贈，方得成行。過揚州，汪孝廉端光復助以行資，始舍舟從陸。道遇漢軍繆秀才公儼（今名公恩）聯車北行。五月初二日，抵都，居黃君景仁寓齋。時四庫館甫開，餽校事繁，座師董公誥爲總裁官，屬總校江寧孫舍人溶延先生至打磨廠寓齋總司其事，歲脩二百金，仲弟亦送入方略館効力。先生節齋所入，半給仲弟館費，以半寄歸爲衣食之資，迎養叔

母余孺人季父希李先生於家，用度益窘，每遇訪友或假書，十里五里，無不步行。八月，應順天鄉試不售。時翁學士方綱，蔣編修士銓，程吏部晉芳，周編修厚輅，吳編修錫麒，張舍人填共結詩社，首邀先生及黃君入會，每一篇出，人爭傳之，是以先生遇雖甚困，而友朋之樂以此二年爲最。九月朔日，女紡孫生。是年得駢體文四十首，詩詞約二百篇。

四十五年，庚子，先生三十五歲。在孫舍人寓校書。仲弟以思家得咯血疾，新歲益甚，先生質衣具資，遣人送歸。時甫近上元，以無衣不克出門，託疾斷慶弔絕過從者凡兩月。時方南巡，諸臣例獻賦頌，先生爲山陰梁尙書國治製頌十八章，首邀睿賞，於是都下求屬稿者甚衆，先生亦精力絕人，日爲孫舍人校官書八

巨冊，類有攷證數十條，夜則製進呈冊頁一通，每至三鼓方休。是年，恭遇萬壽，頌述之文益多，自二月至七月，所製凡五六十篇，得酬金四百兩。時前橋新塋前地一畝欲爲豪家估買，先生得家問，卽以所得金之半寄歸，先與立券，豪家遂不能奪。仲弟病痊後，復假貸北來，先生爲盡償宿逋，并取還前典質之物，類皆賣文錢也。八月，應順天鄉試，出闈卽爲四川查按察禮聘掌書記入蜀，歲修四百金。先生以屢困場屋，不復有進取心，九月朔，遂辭孫舍人暫寓蓮花寺，待查公同行，適其方擢四川布政使，未卽就道。初七日揭曉，中式第五十七名舉人，孫舍人同獲薦，查公遂力止先生無行，於是復遷寓舍人宅。是科座師爲協辦大學士漳浦蔡文恭公新，刑部左侍郎無錫杜公

玉林，內閣學士滿洲嵩貴公。房師爲掌貴州道監察御史清苑李公孔陽。李公閱薦首場卽得疾，二場屬吳江丁郎中雲錦代閱，三場屬嘉定曹中允仁虎代閱。座師以制藝皆散體，已定作副榜第一矣，忽中允得五策，以爲顧亭林復生，蔡文恭公取閱，亦深賞之，遂移入前列，以五策進呈。揭曉後未一月，房師卽以疾逝，先生與同門生視含歛，并稱貸而厚賻之。是歲與黃君及欽州馮編修敏昌，順德張解元錦芳唱和，及詩社所作，共得詩百餘篇，雜文數十篇，著三國疆域志二卷。

四十六年辛丑，先生三十六歲。在孫舍人寓校書。（時遷寓買家胡同）

二月，應禮部試，本房山陰王編修增閱卷呈薦，闈中已定作江南第二本矣，固始吳副憲玉綸爲副總裁，旋以軍機中書汪君學

金卷易之。先是孫君星衍已入關，并札言陝西巡撫畢公沅欽慕之意，先生遂決意游秦。四月十六日，偕崔同年景儀西行。（崔方至四川定省）時征逆回，京兵入陝，道出山西，因迂道由館陶臨清至河洛，抵開封，而資斧已竭，適舊友楊司務仁基，同年管戶部世銘，皆在開封，共假資以行。五月，望後，抵西安，寓開元寺一宿。畢公聞先生來，倒屣以迎，翌日遂延入節署。時幕中爲長洲吳舍人泰來，江甯嚴侍讀長明，嘉定錢州判坵，及孫君與先生凡五人。陝西尙有回警，日偕畢公籌兵畫餉，暇卽分韻賦詩，常至丙夜。間游牛頭香積諸寺，尋曲江及漢唐古跡。又代莊州判斡修延安府志，歲杪方竣。是月二十五日，適汪氏仲姊以疾卒，先生聞訃哭之慟，仲弟以尙未議敘留都，每月揭資

寄之。是年，道中懷古紀游及唱和詩共得二百首，雜文數十篇。

四十七年，壬寅，先生三十七歲。在西安節署。三月，偕同人至

牛頭寺看桃花，抵終南山麓始返。四月，黃君景仁以將赴選謀

資入秦，寓開元寺者三月，間旬必偕孫君出訪之，或同游名勝

竟日而還。六月，至朝邑訪莊大令忻，回塗過潼關，訪陸司馬

維垣之約，（時陸署同州知府，其子戶部鍾，爲先生庚子同年。）留二日，

卽順道游華山，宿玉泉院，質明坐竹兜行二十里，至青柯坪久

憩，（自此以上皆嘗步行。）遂自千尺幢直上，小駐媪神洞飲泉，由

仙人窆日月崖會龍嶺至三天門，塗皆危絕，攀鐵索穿石脇方得

上，先生步行若飛，餘人不能及也。從天門東折詣玉女峯，坐洗

頭盆側，蒼栢滿崖，夕陽欲下，天風泠泠，渺非人境。復上謁金